

**Atham iaine ul woKalaththia**  
**Atham ammakka oPoluc**  
**pokurrinet ul wonoco'rong**  
**coKalaththia**  
**Lon lonothon**

Kalaththia kokat cik itho'rikit thocapu iconu k'ran inenni itti Thurkki. OPoluc ana oPar-napa thokat thongkenet lon iloporot loIeccuo na'ran w'rek woKalaththia ana ul woppot wom-akathe oMiccie (Ku'rathal 13-14). Anaruk akka lon len locothakotho, ul wakkakathe ana wongkenekathe ul ioccotho lon loMiccie itti okin thonu itti okin thammakot lon lothonce'ret lon cik loIouth ana thathuma then, ana ul wen wonu itti wakekkot. Ittina oPoluc pakwarikiet ul ioccotho lon loMiccie itti Kapik ka'ret okkwion appik ithoccotho lon loMiccie ana okorronno oka okkwion ithammakot thathuma th'rek, ana kwerenekin tat akka elli lokat lokkattathe nul wothothilettat woMiccie noka'ran koUruccelim (Ku'rathal 15).

OPoluc pangkene kicce tat lonthomat itti oron thapirie Kapik noka llon ilaron okkot, ana tat akka oron othakka thupupure tokit koKapik llon iloaron thocokthe nomikit, ammakka Aprein okkwi ipokat piki ponomun poul woIouth (Ku'rathal 3-4). Ana kwakene itti thikkoik thonnon ammakka ul ioccotho lon loIeccuo thonu itti oron thittetta ngKanang ikupupure, othakka itti aron occikot lon loKapik ilrik itti oron thangat opilingon (Ku'rathal 5-6).

<sup>1</sup> Oun oPoluc, pul pothothilettat poIeccuo oMiccie iponekkettatheik mpu'ran poIeccuo ana pongappa Kapik ikurokwiet oIeccuo nti ithio. Mpannonekkettat pul pothothilettat poIeccuo lon lopu'rek annoka manna mpu'ran poul anaruk nthakkaro thoIeccuo oMiccie. <sup>2</sup> Mpothinthet non thon oun ana opangkingon ithanin thaik inaththungon appik, onon ithaik thoccokothe lon loIeccuo noththok poKalaththia. <sup>3</sup> Mpipittot Kapik ongappa ana Ili oIeccuo oMiccie itti athoporot ana thomicco oka nanon. <sup>4</sup> Ook ipethet ton ka kung akwokkieron cik nti ilon ilokithak lonnon ana o'ret ton nti ilon ilokithak lonocapu loul iaron thaik tit ammakka Kapik ongappa kongothe itti laka. <sup>5</sup> Ook ipa thirik okane thuputhuput. Amin.

*Lon l'rek lella nolon iloporot loIeccuo*

<sup>6</sup> Mpannopira noka akka lirrierin cikit nti icarak itti inthopa'rinet lon cik accokkot loKapik ikakkarot non itti nthikkoik ithoporot thoMiccie anoine thongkene th'rek. <sup>7</sup> Annoka itti lon iloporot loIeccuo l'rek laik. Anaruk ul w'rek wi'rikiet non ilon ilacikittaro ma ilakannoka loMiccie itti okin thennekke itti okin thakitto lon loMiccie. <sup>8</sup> Anaruk amma onin akkongkenet non lon iloporot loIeccuo l'rek antoka manna u'rupa wothothilettat woKapik wangkenet non al'rek prek na ilanin thongkenet non tokit, kirrinni anin attattako. <sup>9</sup> Mpappopakket lon tit itti amma opilin pappo ongkenenon lon iloporot l'rek nolon iloporot loIeccuo ilanon thoccokothe, akwattattako thupuththuput. <sup>10</sup> Mpaik pannenekke itti aul ongat lon lin, anaruk itti aKapik opira

noka naun. Ana amma mpokat anennekke itti aul ongat lon lin, mpannokat pul iparekine oMiccie.

<sup>11</sup> Pangkingon, mpongothe itti nthina itti lon iloporot loIeccuo ila mpongkenet non anoka pul iponyi akkokkothe. <sup>12</sup> Mpannocco nti ikkun wopul p'rek ana manna mpannongkenetta anaruk oIeccuo oMiccie akkokenerin. <sup>13</sup> Onon thocçikothe lon lothikkoik thin loma'rot akka mpokat ilon lothathuma tholon loul woIouth ana tat akka mpokkikkiethe ul ioccoke the lon loIeccuo thiak ella thiak nociküt ana anenekke itti mpakitto kin. <sup>14</sup> Mpokat pinangkat lon nti iul woIouth iarokat cat cin iommaththik lon inaththungon ana mpapponat thiak thothathuma thothiki thin cannan. <sup>15</sup> Anaruk akka Kapik kakkarrorin amparthuk manna okwonta nthoporot thung, itti anorekinok, <sup>16</sup> akwakenen lon lokkul wung anina akka anongkene ul iannoka woIouth lon lung mpannipittot pu'rek aththik. <sup>17</sup> Mpannoku'rot manna noco'rong coUruccelim itti anothipittot ul wothothilettat woIeccuo iokat tokit naun anaruk mpoththet cik eo noco'rong coMuththu manna antopakot noka'ran koThimacakka. <sup>18</sup> Anakka mpikkot cik luput l'rapuruk (3) anoku'rat noka'ran koUruccelim anothocçikot lon na oPoththuruc poul pothothilettat poIeccuo ana inthikkatheik ma'ri attul ana ikken ukuluk (15). <sup>19</sup> Mpanniot ul wothothilettat woIeccuo w'rek anaruk mpiothe oIakup opang polli oIeccuo. <sup>20</sup> Mpi'ret lon icat tokit koKapik ila mpaik pi'ret non lakannoka lokarra. <sup>21</sup> Ana mpoingkathe

noththok poCuria ana poKilikia. <sup>22</sup> Anaruk ul woLouthia iokat woccokothe lon loIeccuo wokat wanninan ngka kin. <sup>23</sup> Okin thokat akin occicikot lon turuk itti, "Pul ipappokat apoccokiet ul thiat paik pangkene lon loIeccuo inenni ook ipappennekhet itti kwakitto." <sup>24</sup> Ana okin thopirakathe noka noKapik nti ilon lin.

## 2

*Ul wothontholettat woIeccuo wonat oPoluc itho'rküt then*

<sup>1</sup> Anakka mpikkot cik luput attul ana ikken koco'rin (14) mpappropakkat noco'rong coU-rucelim ana noca'ri cen intheot inoParanapa anipat oThiththoc cakuruk. <sup>2</sup> Mpeot Uruccelim akka Kapik ki'rethin itti mponu itti mpaeo ana mpokenekathe ul ittittik thellek lon lohoc-cokot tholon iloporot loIeccuo ila mpokat cik anongkene ul iannoka woLouth, othakka itti athongkene itha mpongkenet okorronno oka lon nuthuk. <sup>3</sup> Anaruk manna oThiththoc pul ipannoka poul woLouth ipanin thokat cik akwitarothin pannokekkot kwanni'rettat nnul ittittik wonoka'ran itti kwakekkot mpu'ran. <sup>4</sup> Lon elli loku'rot ncik akka opangkingon ithonu karra thinikotho itti okin thoccoke the lon loIeccuo inaththungon, anaruk akin okwantot lon ilakitto thikkoik thin ella n're ithanin thonu llon loMiccie oIeccuo ana ennekke itti okin thapakket nin iak wolon iloco'rotheik loMucca. <sup>5</sup> Onin thannocikat lon len aththik othakka itti alon icat iloporot loIeccuo inakka alikkoik ianon.

<sup>6</sup> Ana okkwion ithokat cik thinako itti ul ittittik thannokkot lon l'rek nolon ila mpokat

anere, akka Kapik kaik kakathacce ul nomik̄it kannokathacce toma toul wen wannarottot lon l'rek nolon ila mpongkenet. <sup>7</sup> Anaruk okin thonu nomik̄it men itti Kapik kothiothin itti mpathongkene ul lon iloporot loIeccuo iannoka woIouth ammakka kakkothiothe oPoththuruc noul woIouth. <sup>8</sup> Mpothilathe mpu'ran poKapik noul iannoka woIouth ammakka oPoththuruc ipa pul pothothilettat mpu'ran poKapik cakuruk noul woIouth. <sup>9</sup> Ana ittina oIakup ana oPoththuruc ana oIuanna itha thinakot nan itti okin mil-lang mouI ioccoothe lon loKapik thinat nothoporot thoKapik ithettathin, okin thongakanthet nin oun ana oParanapa inittarot kin iire ithun inongkene ul iannoka woIouth akin ongkene ul woIouth. <sup>10</sup> Anaruk okin thomekathenin itti onin thittarot ul ia iak iella thu'rit cik ana ilen akka oun mpappongthe thiak thiak itti mpakkot.

*OPoluc paik pa'retto naPoththuruc noka'ran kAnththakkia*

<sup>11</sup> Anaruk akka oPoththuruc paat noka'ran kAnththakkia mpa'rettot nak akka kwokat akwokkot lon ilokithak icat. <sup>12</sup> Kwokat cik akwo'rko thu'rit akin oul iannoka woIouth, anaruk akka opilingon thaata nalakup, akwopettat ka kung nti iakin akw'rakat o'rko thu'rit akin aththungon akka kwonat n're noul woIouth iongothe itti okin thakekkiet ul iannoka woIouth. <sup>13</sup> Aul woIouth w'rek opettakat akin omakot lon loPoththuruc, aParanapa omakat kin cakuruk. <sup>14</sup> Anaruk mpimmat kin itti okin thaik thakanomakot kathar kolon ilaik icat lolon iloporot loIeccuo mpi'rethe oPoththuruc tokit ken appik itti, "Oung poul woIouth ana ngkwaik pamakot

thathuma itha ul iannoka woIouth omakot ana tat akka anentet ul iannoka woIouth than itti womakot thathuma thoul woIouth?"

*Kapik ko'rethe ul appik ioccoothe lon loIeccuo*

<sup>15</sup> Laik icat itti oron thoul woIouth nthokwonta anaruk annoka ammakka ul iannoka woIouth iannomakot lon loKapik. <sup>16</sup> Anaruk oron thina itti pul pathikkietta poporot tokit koKapik nthocokot lon nocikkit loMiccie oIeccuo annoka nthomakot lon iloco'rotheik loMucca. Oron cakuruk thoccoothe lon loMiccie nomikit unothakka thoporot tokit koKapik nthocokot lon loMiccie nomikit ana annoka nthokkot lon iloco'rotheik loMucca. Akka pul pella ipaka poporot tokit koKapik nthomakot lon iloco'rotheik loMucca. <sup>17</sup> Anaruk amma oron akkaik thenekke itti oron thaka thoporot ngKapik oMiccie ngngin, ana oron thatthiot itti oron thaik thakkot lon ilokithak tokit koul woIouth? Elli lonu itti oMiccie akkarrotheron ilon ilokithaki? Annokka menik. <sup>18</sup> Amma oun akkopri itti mpapakket lon cik ila mpokat pokittot, ana mpaka pul ipakannocikot lon iloco'rotheik loMucca. <sup>19</sup> Anaruk mpiot nti ilon iloco'rothe cik loMucca othakka itti anoine Kapik. <sup>20</sup> Mpokkuttathe nothapak innoMiccie ana ittina oun akkannokat cik ngka kin anaruk oMiccie akkaik iaun. Ana thikkoik itha mpaik pikkoik inenni mpaik pikkoik nti ithocokot lon lokkul woKapik nocikit iongothin ana iiothe nothapak nti iaun. <sup>21</sup> Mpannoka nti iul iakatha thoporot thoKapik itti thella lon cik tit. Akka amma oron tho'rettathe llon iloco'rotheik loMucca, ittina thio thoIeccuo thella lon cik.

### 3

#### *Thethiëtta thanthan no thoccokot lon no cikiit*

<sup>1</sup> Ul woKalaththia, nthontha akka nthommaik ntima? Oththa akkolikinet non cik itti nthannimmaik? Onon thuret nan akka mperenet non itti oIeccuo pinthet non nothapaki? <sup>2</sup> Mpongothe itti mpina papulukku nanon. Onon thoccot Kanang ikupupure koKapik noKapik akka nthokat anoccokot lon iloco'rotheik loul woIouthi? Ana manna akka onon thoccokothe lon loIeccuo iloporot? <sup>3</sup> Ngintha akka nthommanet cik ntima ittina? Onon thoku'ret lon ncik mpu'ran poKanang koKapik ikupupure ana nthongothe itti nthamartto mpu'ran popul iponyi? <sup>4</sup> Nthokkietathe thiak kannan nuthuki? Mpoo itti lakannoka nuthuk. <sup>5</sup> Kapik kethet non Kanang kung ikupupure ana okkot lon ilommaththik iloporot itho'rküt thon othakka itti akka nthommakotho lon iloco'rotheik loMuccai? Annoka menik. Kapik kokkothe lon len akka onon thoccokothe lon lung nomiküt mon. <sup>6</sup> Nantoccot kit nAprein ammakka Atham wi'ret itti, "Kwocokotho lon loKapik nociküt ana Kapik kothikkiekathok pellek ipoco'rothe lon cik." <sup>7</sup> Ittina nina nan itti okkwion ithocokotho lon loKapik nomiküt, oththan pen Aprein. <sup>8</sup> Atham woKapik wi'ret nci ma'rot alarthuk othakka itti Kapik kathikkie ul iannoka woIouth woporot nthocokot lon loKapik nomiküt then ana ongekene lon iloporot loIeccuo ili'rettathe Aprein itti, "Ul appik waKapik ethiët cik nti

ilon lang.” <sup>9</sup> Menik okkwion ithoccoke lon loKapik nomikit thethiekot cik okin Aprein pul ipoccoke lon nocikit.

<sup>10</sup> Anaruk okkwion ithonekkethe lon nomikit itti okin thareko llon iAtham wolon iloco'rotheik loMucca okin thattattako appik, akka lokurrakot itti, “Athattattako oka nakkwion ithaik thannoreko llon appik ilokurrakot iAtham woKapik wolon iloco'rotheik.” <sup>11</sup> Laik papenang itti pul pella paka tokit koKapik poporot llon iloco'rotheik, akka “Pul paka tokit koKapik poporot ana ikkoik nthocokot lon loKapik nocikit.” <sup>12</sup> Lon iloco'rotheik loMucca lakannoka ammakka lon lothocokot lon nomikit, anaruk “Pul ipaccikot lon ilalon iloco'rotheik li'ret kwakkoik.” <sup>13</sup> OMiccie pelikkot ton nti ithattattako tholon iloco'rotheik loMucca ammakka lokurrakot itti, “Kwattattako okkwi ipiothe nothapak.” <sup>14</sup> Kwelikkot ton itti athethieko itha Aprein poccot aine ul iannoka woIouth nti ikkun woMiccie oIeccuo. Ana nthocokot lon nomikit oron thacco Kanang ikupupure ikonekkettanhet ton cik.

*Thonekket lon cik thoKapik thannoprtaikoik*

<sup>15</sup> Pangkingon, nantokorronnon anokenenon lo'rek nolon ilaik ilaul okkot appinappin tokit konon. Pul p'rek pella ipapa're lon cik lorthun ilonekkettatheik ana manna arottot nan pellek.

<sup>16</sup> Kapik konekkenthet Aprein lon cik ana opiki pung. Ana Atham woKapik wannire itti thiki ithonu itti nyukul nyoppot anaruk wi'ret itti piki



iponu ukul wulukku ana ook oMiccie. <sup>17</sup> Ila mpongothe itti mpi're itti, Kapik konekkethe lon cik ma'rot okin Aprein ana konekkethe lon cik itti kakorronno arrot cik. Akka okin thonekkethe lon okin Aprein, Kapik kikkiekathok cik luput arrial ukuluk ma'ri moco'rin ana arrial ana attul (430) akekat oMucca lon lothonce'ret lon cik anaruk lon lothonce'ret lon cik elli lokorronno opa're thonekket lon then okin Aprein ana manna okitto lon ila Kapik konekketheik. <sup>18</sup> Amma lon iloco'rotheik loMucca lethet ton thethieko thAprein, ittina thonekket lon cik thelako lon len. Anaruk lakannoka menik akka Kapik kethet Aprein thethieko nthonekket lon cik ilakkonekketheik. <sup>19</sup> Ittina lon iloco'rotheik loMucca lokat cik akaintha? Lon iloco'rotheik lokat cik itti alokene lon liatha ilokithak ilokkattathe. Anaruk lon elli lokat itti laik lathomattat amma ukul waat iaKapik konekkenthet lon cik itti waik wanthan. Kapik kethet u'rupa wothothilettat woKapik lon lung iloco'rotheik itti wethet oMucca okkwi ipokat pul ipannekine ul lon nnoKapik. <sup>20</sup> Amma ul we'ra waik wathi'riko lon pul p'rek ponu itti pakaik, anaruk Kapik kokkinthet Aprein thonekket lon cik thung pellek.

<sup>21</sup> Lon lothonce'ret lon cik laik lakitto thonekket lon cik thoKapiki? Annoka ittina kirrkkir! Amma lon lothonce'ret lon cik lokat lethet ton thikkoik thie, oron thaakat iku'ri ngKapik nthommakot lon iloco'rotheik. <sup>22</sup> Anaruk Atham woKapik wi'ret itti ul nocapuncik appik waik ikkun wopu'ran pa'runa iokithak, othakka itti aKapik ethet okkwion ithoccoke lon loIeccuo oMiccie nomikit ilakin

thonekkettanthei cik.

<sup>23</sup> Anaruk akka thocokot lon nocikit tharthuk ao, lon iloco'rotheik lalunukkwotheron ikorrkkor puccuk athanthan thothocokot tholon loIeccuo nomikit ummot ncik ithokat atho'rikakot. <sup>24</sup> Nantokorronnon ani're ngkathar engki, lon iloco'rotheik langwotheron puccuk aMiccie anthan. Ittina inenni nthocokot lon nomikit iaMiccie oron thaik iku'ri thoporot ngKapik. <sup>25</sup> Inenni ca'ri cothocokot lon loIeccuo nomikit caat ana lon iloco'rotheik lakannoka itti langwot ton p'rin.

### *Nyukul nyoKapik*

<sup>26</sup> Onon thanyukul nyoKapik appik nthocokot lon loIeccuo oMiccie. <sup>27</sup> Akka onon ithocot mamuthie ngk'ran koMiccie, thi'rikot ilon lung thupuththuput. <sup>28</sup> Ittina thopettako thella itti okkwempi poul polouth ana okkwempi poul iannoka wolouth, ana itti okkwempi ipa piak ana okkwempi ipannoka papiak, ana okkwempi pocura ana okkwempi popari. Onon thulukku appik ilon loMiccie oIeccuo. <sup>29</sup> Ana amma onon akkulukku ilon loMiccie menik onon more mAprein ana onon akkapakkot nothethiekot cik itha Kapik konekkenthet Aprein cik.

## 4

<sup>1</sup> Anaruk itti anomaket lon lin, ukul ia-pakkot na'rupu woththan kwammakka piak akka kwarthuk potte ana kwaik inyaun nyopilingon. <sup>2</sup> Anaruk wikkoik inyaun nyoul iaththan poththenet lon lung nakin puccuk aca'ri akkakat ica oththan ponekkethe cik itti kwapakkot na'rupu. <sup>3</sup> Ilen elli ilakene ton cakuruk itti

oron thokat ca'ri ce'rek tharran ana iak wolon iloco'rothe cik lonocapu ncik appik. <sup>4</sup> Anaruk akka ca'ri caat icekkot nan papennang Kapik kothiathe ukul wung iokwontat nti pul ipopari ana wikkathe cik inyaun nyolon iloco'rothe cik loul woIouth <sup>5</sup> itti akwelikko okkwion ithokat inyaun nyolon iloco'rothe cik aron athakka nyukul nyoKapik inyaKapik kupothot. <sup>6</sup> Ana akka oron thanyukul nyung, Kapik kothinthet ton Kanang kokkul wung ikupupure nomikit monon, ki'rethe ton itti, Appa, ngappa ponnon. <sup>7</sup> Ittina onon thannoka iak p'rin anaruk onon thanyukul inyomura ana inyari nyoKapik ana menik Kapik kapakket non na'rupu wung iakonu appik.

*OPoluc paik pakwarittikot ul wo Kalaththia*

<sup>8</sup> Menik tokit akka onon thommat Kapik nthokat iak woa'rupu iannoka Kapik. <sup>9</sup> Anaruk inenni onon thina Kapik ana icci Kapik akkina non nanon. Nthontha akka anopa'rine Kapik cik anothakka iak woa'rupu wonocapu iannoka icat? <sup>10</sup> Onon thaik thaccot kit noma'ri pellek ana anak ana cik cothuput ana luput lokamuthe koIouth ikaIouth occot kit nan. <sup>11</sup> Mpella cikit icarak ntianon, ngre iamporekinet non ngurathe cik nuthuk.

<sup>12</sup> Pangkingon, mpongothe itti nthikko cik ammakka mpaik okorronno opellene lon iloco'rothe cik akka mpothakkat ammakka onon thokat ella n're nolon iloco'rothe cik loIouth. Onon thannokkothin lon lokithak ca'ri ica ampokat anerentenenon lon loKapik. <sup>13</sup> Akka nthina itti mpokat pongo akka mpongkenet non lon iloporot loIeccuo cittokit. <sup>14</sup> Ana manna

thonga thin thokat ere thennekke thothon-  
gathin thon nthannoththothin cik ana 'ra lon  
lin anaruk onon thikkierin cik ere oun u'rupa  
wothothilettat woKapik ana manna ere oMiccie  
oIeccuo ngka kung. <sup>15</sup> Onon thathopirat noka  
cannan mencen ana thopira noka thon then  
thaik kartha? Ngintha akkokittot thopira noka  
then, akka mpina itti amma kathar kokat cik ika  
anethin kit kon ko tomma ngngin ana mpaaccot.  
<sup>16</sup> Mpothakkat pul po tho'rak pon akka mpi'rethe  
non lon ilaik icari?

<sup>17</sup> Ul ennrik wongothe itti onon thamakot kin  
anaruk thongat non then thannoka thoporot  
nanon. Anaruk lon ila kin thongothe appik  
itti okin thapa're non cik naun anongat kin  
anomakat kin. <sup>18</sup> Amma onon akkongothe itti  
nthangat lon, nongat lon ilaik icat appinappin  
annoka tulluk amma ampaik. <sup>19</sup> Nyukul nyin,  
mpaik paccokot thiak ere pul ipaik pakwono  
nti ilon lon, ana thiak then thakannomttat an-  
immakat lon loMiccie loppathe nomikit mon.  
<sup>20</sup> Mpongothe itti mpaakat ianon othakka itti  
anerene non mpo're pellek ana cikit coporot.  
Mpaik paccokot thiak thon anganna.

### *OCcara ana Acar*

<sup>21</sup> Ni'rethin onon ithongothe itti nthamakot lon  
iloco'rothe cik? Onon thannocikot lon ila lon  
iloco'rothe cik erei? <sup>22</sup> Li'rettat itti Aprein pok-  
wonot nyukul nye'ra w'rek wokwontat nti iapari  
ipa piak ana a'rek nti iapari ipittat. <sup>23</sup> Iokwontat  
nti iapari pung ipittat wokwontat nti ilon ila

Kapik konekkenthok cik ana iokwontat nti ipiak wokwontat ammakka nyukul okwonta.

<sup>24</sup> Lon loul iari enni ie'ra lakene thonekket lon cik thoKapik ithe'ra. Acar pari ipa piak pakene thonekket lon cik thoKapik thonoco'rong coCina naul wokat iak wolon iloco'rothe cik cinomun. <sup>25</sup> Ana inenni Acar ook Uruccelim iaik ammakka co'rong coCina noththok poMuththu, akka Uruccelim ana opeon thikikkot cik akin okkikkiettat thiak llon iloco'rothe cik loul woIouth. <sup>26</sup> Anaruk oCcara ipittat paik ammakka Uruccelim iaik tothi'rot iannoka piak ana ook onnan ponnon <sup>27</sup> akka Atham woAccaia wi'ret itti,

“Opira noka oung ipoco'rot pucung,  
okinti kuri cittan oung ipa ukul wannok'rello  
akka nyukul nyopul ipopari ipa pucung nyirik  
nonyukul nyopul ipopari iponu olle.”

<sup>28</sup> Pangkingon, onon thathakka nyukul nyoKapik nti ilon illo onekkettathe cik ammakka oIccaak. <sup>29</sup> Ana ammakka ukul iokwonta nti ipul ipopari nuthuk ipakannitta wakkiet ukul thiak iokwontat mpu'ran poKanang koKapik ikupupure ana ilen akkaik menik inenni. <sup>30</sup> Atham wi'ret itti kaththa? “Othiothe ukul wopiak thapat okin onnan akka ukul wopiak wannocco pap'rek na'rupu woththan pokkul popul ipopari ipittat ipannoka papiak.” <sup>31</sup> Menik pangkingon, oron thannoka nyukul nyopul ipopari ipa piak anaruk oron thonyukul nyopul ipopari ipittat ipannoka papiak.

## 5

*No'rumo nothella n're thon*

<sup>1</sup> OMiccie pelikkot ton nti ithothakka iak wolon iloco'rothe cik. No'rumoik, nokorronno opakkinthet thothakka iak wolon iloco'rotheik attang. <sup>2</sup> Nokkwine lon lin kunu ncik, oun oPoluc mpi'ret non itti amma onon thapparo okorno kakon itti nthapakkot ilon lothokekkot, lon loMiccie lella loncik aththik nanon. <sup>3</sup> Mpappi'ret non ithomura itti okkwi ipapporo okekkot kwonu itti kwamakot lon iloco'rotheik loMucca ap-pik. <sup>4</sup> Ana okkwion ithaik thennekke itti okin thathikkie ka ken thoporot nthommakot lon lothonce'ret lon cik loMucca anokatha okin thopettothe ka ken cik naMiccie ana okin thaik thannappiot thoporot thoKapik. <sup>5</sup> Anaruk oron ntrun o'rikot lon itti Kapik kathikkie ton thoporot nthocokot tholon thonon ana mpu'ran poKanang koKapik ikupupure. <sup>6</sup> Anaruk ilon loMiccie oIeccuo thokekkot ana ul iannoekkkot thella lon cik naMiccie anaruk thocokot lon loKapik ithakorronnong angat ul w'rek akkaik.

<sup>7</sup> Onon thokat anocikot lon loMiccie, oththa akkoce'ret non itti nthannocikot lon ilaik icat? <sup>8</sup> Lon lokkwi ipoce'ret non lon lung lakannoka loKapik ikakkarot non. <sup>9</sup> Ammakka lanako itti, "Mü'rükül motte minyie me're ncik appik." <sup>10</sup> Amparthuk ponu lon noucce itti oron thaik tothun ilon loIli unaththungon ana nthanneo nocipit ce'rek. Ana okkwi ipaik pacikittinthe non lon ima pakkamako antoka manna ook okkwen. <sup>11</sup> Pangkingon, amma oun akkaik peret

lon lothokekkot, ngingtha akka onon appoccock-ienthattet thiak? Ittina thokkwet ana thokkwot nothapak thella lon cik. <sup>12</sup> Mpongothe itti ul iaik wacikittot non lon ima itti onon thakekkot akin o'rungkot nothokekkot puccuk akin othakkakat lomo're.

<sup>13</sup> Pangkingon, Kapik kakkarot non itti onon thikko cik ella n're nolon iloco'rotheik. Okoronnoka itti onon thikkoik ella n're anokkot lon ilaka kon kongothe ilokithak anaruk orekarane nthongarot. <sup>14</sup> Lon iloco'rotheik loMucca li'rettat ilon lulukku itti, "Ongathe ul w'rek ammakka ngkwongothe ka kang." <sup>15</sup> Amma onon thaik thathittettarene cik ana ikkoik tothun ella thongarot cik, no'rumoik akka onon okittaro.

### *Thikkoik mpu'ran poKanang*

<sup>16</sup> Ittina mpi'ret non itti nikkoik thikkoik ithaKanang ikupupure koKapik kongothe ana nthannomakot ila ka kon kongothe. <sup>17</sup> Akka lon ilaka konon kongothe Kanang ikupupure koKapik kannangkot ana ila Kanang ikupupure kongothe ka konon kannangkot, elli alule'ra la'rarot ana lakannoka tothun. Ana ittina ngkwannokkot ila ngkwongothe itti ngkwakkot. <sup>18</sup> Anaruk amma Kanang ikupupure koKapik akkaik kitteng ittina ngkwakannoka inyaun nyolon iloco'rotheik. <sup>19</sup> Lon ilaka kangothe lakorronno kin akin okkot lon lokithak ammakka itti, tha'ro nul nuthuk ana thongat lon ilokithak ana namat, <sup>20</sup> tha'rane a'rupu wothurukut nga'rama ana tha'ruthuththaro ana th'raro ana tha'retto ana thonyira ana thua ka ana thipot

ka thoura ana thopettako ngkuthuk perek <sup>21</sup> ana ul ianyira ana ikko ngapak kannan ana a'raro nngin kurekkurek. Mperene non ammakka mperenet non mecten ana mpei papperenenon itti okkwion ithakkot lon elli thaKapik kannethet tha'rthan thung.

<sup>22</sup> Anaruk Kanang koKapik ikupupure kethet-tot thongarot ana thopira noka ana thomicco ana thocokot cikit ana thoporot ana thocokot lon loKapik nocikit kannan, <sup>23</sup> ella thipot ka thoura ana tho'rumo noka. Ana lon ammakka elli lella lon iloco'rotheik.

<sup>24</sup> Ana okkwion ithocokothe lon loMiccie oIec-cuo thoththet lon ila ka ken kongothe ammakka laik. <sup>25</sup> Inakka oron thaik thikkoik ngKanang koKapik, ittina oron thonu itti oron thakkot lon ila Kanang koKapik ikupupure kongothe.

<sup>26</sup> Oron thonu itti oron thannipot ka thoura ana urttet ka cik ana onyirarane.

## 6

### *Thokkinthet ul lon iloporot appik*

<sup>1</sup> Pangkingon, amma pul p'rek poccokittathe lon ilokithak, onon ithonu Kannang ikupupure thonu itti onon thakenek kathar ikoporot kic-cekicce. Anaruk no'rumo noka kon cakuruk akka anokkot ammakka ook. <sup>2</sup> Nittararot llon ilimin ana ittina onon tha'rumo nolon lomiccie. <sup>3</sup> Anaruk okkwi ipe'ret itti ook poporot ana kwannoka poporot, kwaik pammikkot ka kung. <sup>4</sup> Apul okathacce ingre ngung kicce ana lon lung kappak akwopirakat noka nan akwantipot ka thoura, okorronno opri ook akkoporot noul



w'rek. <sup>5</sup> Akka pul ponu itti pacco lon longre ngung inga kwokkothe ngka kung.

<sup>6</sup> Ana okkwion ithaik thangkenetta lon loKapik thonu itti okin thikket ul iangkenekin a'rupu ioporot appik iakin thonu.

<sup>7</sup> Kirnni ammikkot ka kang Kapik kannokkattat ngure nan pul pakio a'rupu iakkworat. <sup>8</sup> Okkwi ipeet akwopirie lon ila ka kung kongothe kwiot thio nan, ana okkwi ipeet akwopirie Kanang koKapik noka, kwiot thikkoik thothupuththuput noKanang koKapik. <sup>9</sup> Kirnni ipongore nothokkot lon iloporot akka ngkwiot lon loporot ca'ri ce'rek amma ngkwannoco'ro ntit. <sup>10</sup> Ittina inenni akka oron thonu ca'ri tun okkinthet ul lon iloporot appik ana anganna ul ioccoke the lon loKapik nomikit men.

### *Lon lo oPoluc ilocothothe*

<sup>11</sup> Mpakurrinenon ka'ramacak engki me'ripil mittittik nukun win. <sup>12</sup> Ul iangkene ngkarra wongothe itti waruket non anokekot, aul woIouth ongat kin. Okin thakkot elli othakka itti akin okorronno occokiettat thiak nti ilon loMiccie. <sup>13</sup> Akka okkwion ithokekkothe thaik thannomakot manna lon lothonce'ret lon cik loMucca. Anaruk okin thongothe itti nthakekkot akin antipot ka thoura akka onon thocckithe lon len. <sup>14</sup> Naun mpella lon ilanipot ka thoura ngngin anaruk thio tholli oIeccuo oMiccie nothapak tulluk akka ithen akkoronnorin anokorronno ikkoik ngkathar ika ul ikkoik ngngin ana okin thomma lon ila ampaik pikkine cik ittina. <sup>15</sup> Lakannoka tulluk ithokekkot manna annoka

thokekkot thoporot anaruk inopul iponyi iloporot itti pul paka pokwontat pie. <sup>16</sup> Athomicco ana thiak oka nokkwion ithaik thamakot lon elli manna noul woIccereil ul woKapik.

<sup>17</sup> Nciki inenni apul ella ipamien cik akka mponu u'ret woIccuo noka kin. <sup>18</sup> Pangkingon, athoporot tholli wonnon oIccuo oMiccie oka nanon appik. Amin.

**Lumun**  
**Lumun: Lumun (Bible)**

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.  
All rights reserved.

2020-11-18

---

PDF generated using Haiola and XeLaTeX on 23 Aug 2023 from source  
files dated 29 Jan 2022

b9cb69ce-3694-5d9f-bda5-4a2243fae